



Minggu, 22 Mei 2022
Ogen: Masmur 23:1-3



IpelimbaruNa Gegehiku



Ibas pelajaran alam i sekolah lit sinigelari sumber daya alam yang terbatas dan tidak terbatas. Sumber daya alam si terbatas e banci ikataken la erkeri-kerin, la ersibar. Tapi si terbatas e ertina ersibar, seh paksana ntahe pe seh batasna lanai lit man buaten. Adi bas geluhta enda kai nge si erbatas? Banci ikataken gegeh pe ersibar nge bas dagingta. Gegeh e me sierbanca kita ngasup ndahiken dahinta, lit sura-suranta erbahan kai-kai, makeken waktuta gelah ula sia-sia. Adi la lit gegeh e, maka la turah sura-suranta, turah pinakit bage pe kote.

Raja Daud megati kote, kenca mulih erperang nari, ngalaken erbage-bage fitnah bas imbang-imbangna nari bage pe i bas ndalani geluhna selaku raja, bapa ras kemahen Tuhan. Muas ras melihe nandangi nakan ras inemen subuk secara doni bage pe pertendin erbahanca kita nggeluh erpala-pala mate terbiar-biar. Tapi i bas ndalani geluh selaku pejarah bas doni enda, lit sada kuncina i bas Raja Daud. Gegeh si mbaru ialokenna perbahan ijadikenna Tuhan jadi permakan bas geluhna. Permakan e me si ngiani ras mperdiateken asuh-asuhenna. Raja Daud la njadikan ia jadi tokoh utama, ia menjiwai peranna selaku biri-biri, Tuhan kap permakanna. Permakan e nge si ngeteh kuja atena ibabana biri-biri e, ia sincukupi keperluanNa, janah Tuhan kap simpelawes kerina pemangsa-pemangsa si ndaram-ndarami biri-biri e gelah ikerikenna.

Raja Daud selaku biri-biri ngikut-ngikut ras erpengendes saja man Tuhan, si mpermakani ras si ngaturken geluhna. Mpelimbarui gegehna si ersibar. E maka ise si nggit ipelimbarui Tuhan gegehna, bahanlah Tuhan jadi tokoh utama singaturken geluhta. Gegehta ersibar, tapi gegeh ras kuasaNa la lit sibarna. Ibabana kita ku kelbung si gelap tapi iterangiNa dalam e, gelah jumpa kita mbalmbal si meratah.